

完全獻身

Hit-ê 人應講：「你 tiòh 盡心、盡性、盡力，盡意疼主你 ê 上帝，mā tiòh 疼厝邊親像家己。」（《全民台語聖經》路加福音 10：27）

Tī 殘酷 ê 希特勒納粹統治下，有一位德國牧師名叫做迪特里希·潘霍華 (Dietrich Bonhoeffer)，伊成做基督 ê 殉教者。Tī 伊最後一 pái tng 去德國 chìn 前，伊有牧幾間教會——一間 tī 西班牙，兩間 tī 倫敦。不管伊 tī tó 位服事伊 ê 上主，伊 ê 心永遠 lóng 留 tī 德國。

潘霍華有一個朋友名叫做 Lai-in-hō Ní-buh (Reinhold Niebuhr)，伊是 tòà tī 美國 ê 德國神學家。Tú tī 二次世界大戰爆發 chìn 前，潘霍華接受 Ní-buh ê 邀請去美國演講。Tī hit 期間，希特勒掌權，而且開始迫害伊 ê 反對者，包括一 koá 教會內 ê 人。Ní-buh 想 beh ko-chiâⁿ 潘霍華留 tī 美國來確保伊 ê 安全，m̄-koh，潘霍華拒絕。伊宣布講：「我一定 tiòh kah hiah-ê tī 德國 teh 受迫害 ê 基督徒做伙。」所以，潘霍華 tng 去到伊所疼 ê 家鄉。

伊一旦到 hia，就開始宣講反對納粹主義、種族主義 kah 白人至上主義。預料會到 ê，希特勒 kā 伊掠起來。潘霍華受關監，一直到聯軍解放德國 ê 前幾日，希特勒下令 kā 伊處死刑。Chit 位勇敢 ê 德國牧師成做一個為耶穌基督獻身 ê 門徒來死。

潘霍華 ê 一本 siōng 出名 ê 冊名叫

做《門徒 ê 代價》，伊 tī 冊內譴責 hit-ê 伊所講 ê 「粗俗 ê 恩典。」伊堅持一個人若無完全獻身，就 bē-tàng 跟 tòe 基督，不管 hit-ê 獻身會 chhōa 伊去 tó 位；對伊來講，伊 ê 獻身是 kā 伊 chhōa 去到納粹 ê 吊刑架。

雖然咱 ê 罪性阻止咱每一個人完全為基督來活，koh 阻止咱抵抗世間 ê 試探，m̄-koh，咱 lóng 應該努力來追求完全獻身，不管它有可能會 chhōa 咱去 tó 位。

祈禱：上主 ah，求祢幫助我避免 hit 種會鼓舞我 kā 信仰 ê 責任 khng 一邊 ê 粗俗 ê 恩典。求祢 hō 我勇氣來問我家己：「Án 怎 chiah ē-tàng kā 我 ê 救主耶穌基督 ê 言行 koh khah 生動表現出來？我 tiòh án 怎做，chiah ē-tàng 達到我 ê 救主 ê 優先事項 kah 標準，成做一個成功 ê 基督徒？」我 án-ne 懇求是奉祂 ê 聖名。阿們。

(1995.04.23)